

BN SARAWAK DIPELABA NADAI PENANGGUL MENANG BESAI

09 April 2016

- The Borneo Post Online

KUALA LUMPUR : Barisan Nasional (BN) dipelabaka ulih menang besai maya Pengawa Bepilih Besai Nengeri (PRN) serak tu bepelasarka penyulut rikod enggau penampak rita parti parti gempung nya diatu.

Ari penemu sekeda pemerati politik madahka, BN ulih menang baru majoriti dua dua pertiga sereta dipelabaka mayuh menang penuduk ngelui ari nya.

Asil pansik Kaunsil Profesor Menua kena Oktober 2015 terang amat ngayanka pekara nya, ku pemerati politik Prof Madya Dr Jeniri Amir.

Iya numpu ngagai Kepala Menteri Sarawak ke mega nyadi Chariman BN Nengeri Datuk Patinggi Tan Sri Adenan Satem diatu bulih tikas pengelaku ke pepadu tinggi iya nya 85 peratus.

“Tu ngelui ari tikas pengelaku ke digaga Merdeka Centre ba pun bulan Januari taun nyin kemari ke mandangka iya semina bulih tikas pengelaku 71 peratus.

“Tu nadai utai bukai berindik ari penemu minta pulai kuasa ungkup Sarawak ke disibur berengkah ari bulan Julai nyentuk September taun nyin kemari di[eda setipak enggau peneka rayat Sarawak,” ku iya lebu dirandau Bernama.

Bisi 11 penuduk Kunsil Nengeri (DUN) baru deka diperebutka maya PRN ke-11 tu pengudah pengawa ngaduka adan baru sitak DUN dipejalaika taun nyin kemari, ngujungka penyampau semua penuduk nambahk ngagai 82.

Adenan sebedau tu madahka DUN Sarawak deka dipadam kena 11 April.

Ba PRN 2011, BN menang 55 ari 71 penuduk lalu laluh iya dipenggi DAP (12), PKR (tiga), enggau Bibas (seiti).

Jeniri, ke mega lecture kanan Sains Sosial di Universiti Malaysia Sarawak madah 51 ‘ubah’ ke digaga Adenan nyengkaum ngemaduka bayar tol enggau ngurangka rega elektrik dipeda ngujungka BN nengeri agi dikerindu.

Sepenemu enggau iya, lecture sains politik di Universiti Malaya Prof Madya Dr Awang Azman Awang Pawi ke melabaka BN ulih menang ambis nadai semilan ari 11 penuduk baru nya.

“Kebuah pia laban sitak tu endang kubu kuat BN, lalu majoriti pengundi ditu endang pengundi menua pesisir ke nyadi pengundi kuat BN Sarawak,” ku iya.

Tu berindik ari penyampau etnik di 11 sitak baru nya, tiga (Gedong, Kabong enggau Telian) tebal agi bansa Melayu/Melanau, tiga (Stakan, Selirik enggau Samalaju) tebal diuan bansa Iban, dua (Murum enggau Long Lama) majoriti Orang Ulu, dua (Serembu enggau Triboh) majoriti Bidayuh enggai seiti (Batu Kitang) majoriti China.

Nya alai, peluang penyakal, ku Felo Kanan di Universiti Kebangsaan Malaysia Prof Dr Mohd Faisal Syam Abdol Hazis melabaka PAS enggau kerimpak parti iya Amanah, enti diperatika pengelemi sida sigi enda ulih ngalahka Bn.

Mohd Faisal ke mega peranak Sarawak madah, penyarut ke nyadi dalam parti Islam nya bisi ngurangka pengarap pengundi.

“Terubah iya, aku ngasaika PAS ba jalai ke ulih menang. Maya PRN 2007, sida ngerikodka pemutus ti manah di Beting Maro.

“Tang diatu penyarut ke nyadi majak raya ngujungka parti nya tusah deka menang lalu aku ngasaika PKR enggau DAP deka ngerikodka pemutus ti lebih manah dibanding enggau dua parti tu,” ku iya. — Bernama